

EUSKALTZAINDIA SALÓ DEL LLIBRE DE BARCELONA 2006

2006ko abenduaren 26an

Jon Artza,
argitalpen banaketa arduraduna

Ricardo Badiola,
argitalpen eragilea

2006ko azaroaren 21etik 26ra, *II. Saló del Llibre de Barcelona* ospatu da bertako erakustazokan. Antolatzaileak Kataluniako Editoreen Elkarte, Barzelona eta Katalunia Liburutegien Elkarte eta *Fundación del Llibre* izan dira.

Institut d'Estudis Catalans-ek gonbita luzatu zion bai Euskaltzaindiari, eta bai *Consello de Cultura Galega*-ri ere, Liburu Azoka honetan parte har zezaten. Gonbitea ontzat hartu, eta bertan izan dira Euskaltzaindiko argitalpenak salgai eta webgunea ikusgai. Horretaz gain, Euskaltzaindiko argitalpen zerbitzuko kide diren Ricardo Badiola eta Jon Artza bertan izan dira azaroaren 21 eta 22an.

Euskaltzaindiak, bere katalogoaz gain, 65 argitalpen inguru izan ditu salgai, alegia, azken nobedadeak aurkezteaz gain, *Neologismos en la obra de Sabino Arana*, Iker 18; Mendaur I.: *Satrustegi: ereile eta lekuko*; Mendaur II: *Baztango mintzoa: gramatika eta hiztegia*; baita beste hainbat argitalpen ere: *Euskal Izendegia*, *Hiztegi Batua*, literatura klasikoaren bildumakoak, literatura sariketakoak, EGLU bildumakoak, Onomasticon Vasconiae, Iker, Euskarenen Lekukoak.... Orotara 8 liburu saldu dira. Nahiz eta salmentak ugariak ez izan, hala ere jende askok agertu du gure erakundearekiko interesa, eta ondorioz –*Argitalpenen Katalogoa* deritzon liburua bisitariiei ematen zitzaizen– Era-kundearen irudia zabaltzeko baliagarria izanik.

Orotara 250 argitaletxe inguruk hartu dute parte aipatu Liburu Azokan. Euskal Herritik ere baziren zenbaitzuk, hots, Alberdania, Euskal Herriko Editoreen Elkarte, Elkarlanean, Sua edizioak, Ttartatlo, Txalaparta... Astean zehar jende asko ibili ez bada ere, aitzitik asteburuan bisitari ugari izan dira. Liburuak begiratzeaz gain hara jo dutenek Azokan bertan izan diren hainbat aurkezpen, mahainguru eta ekitaldiz gozatzeko aukera izan dute eta argitaletxeen katalogoaz jabetzeko era.

Honetaz aparte, Azoka honek IEC (*Institut...*) eta Euskaltzaindiaren artean diren harreman bikainekin jarraitzeko parada eman du. Standean IEC-eko hainbat langile izan dira: Francesc Albar, Sandra Rigall, Ramón Martínez eta Jordi Pedrola... Antolakuntzaren ardura nagusia, Manuel Pascual, Institut-eko argitalpenen banaketa arduradunak izan du. Hauetaz gain Joan Martí IEC-ko Filologia saileko buruaren bisita izan genuen. Hauek guztiek oso harrera ona egin eta Euskaltzaindiarekin elkarlanean jarraitzeko nahia erakutsi dute. Aurten ere iaz esan zigutena berretsi dute, alegia, komeniko litzatekeela, urtean zehar, elkarren arteko topaldi moduko batzuk antolatzea. *Saló del Llibre*-z bali gintezke, edo baita Durangoko Liburu Azokaz ere. Aurten ere IEC-ren liburuak Durangoko 41. edizioan izango ditugu ikusgai. Iaz ez bezala Manuel Pascual, argitalpenen banaketa-arduraduna, ezin izan da hurbildu, baina jarraiko urteetan etortzeko asmoa adierazi du.